

Jahresbericht 2016 der Präsidentin und der Hauptleiterin

Üsäs Vereinsjahr het Mitti März mitäm Schiiweekend in Meiringä-Haslibärg gstartät. A derä Steu ä grossä Dank a Sandro Lüthi wo dä Alass scho sit Jahrä für üs organisiert. Sowohl im 2016 wie o i aunä vorhärigä Jahr isch d'Organisation vom Feehn immer super gsi!

Sportlech gse hei mir üs i vielne Trainings ds Toffen und im Trainingslager ds Burgdorf uf d Wettkämpf vorbereitet. Da mirs scho so guet kenne ds Burgdorf isch aus rund glofe. Bi vielne verschiedene Lektionen hei mir a dä schätzbare Wettkampfprogramm gfielt und üsi Kraft/Usdur und Technik i dä andere Diszipline verbessert.

Am 5. Mai het üs d'Turnfahrt nach Mühlebärg gfuehrt und nach dr Predigt si mir zrugg uf Toffä zum Brätlä und gmüetlächä Zämäsi ufäm Spielplatz.

Am Seeländische Turnfest ds Schüpfen hei mir chli mit dä üssere Bedingige ds kämpfe gha. Ä Pändelstafette oder Fachtst im Schlamm isch nid so eifach gsi. Aber äs isch ja dä andere Vereine o nid besser gange, drum chöi mir mit üsne Leistige glich ds fride si, vor allem d Stufenbarre-Note isch mitem nä 9.40 super gsi.

Zersch zu dä Einzelwettkämpfer:

- 3. Rang: Steffi Bütler 4 Kampf
- 3. Rang: Alex Bütler Berner 6-Kampf

Im Vereinswettkampf hei mir mit ärä Punktzahl vo 25.69 dr 8. Rang ir 1.Stärkeklass erreicht, mit folgende Diszipline Note:

KUG: 8.87, SSB: 9.40, BA: 8.62
WE: 8.33, STH: 9.27, FTA: 8.49
TAE: 8.33, SB: 8.79, PS: 7.44

Im 1-teilige Vereinswettkampf Gym/Tae hei mir mit der Note 9.07 ds oberst uf ds Podest chönne sta.

Am Kantonalturfest ds Thun si am erste Wuchenänd üsi Einzelturmer im Isatz gsi und hei folgendi Plätz erreicht:

- 2.Rang LA U20 w: Stefanie Bütler
- 2.Rang LA U20 m: Alex Bütler
- 28.Rang LA 4K w: Fabienne Bugnon (Auszeichnung)
- 12.Rang LA 4K m: Ändu Schläppi (Auszeichnung)
- 25.Rang Turnwettkampf -35: Michael Beyeler (Auszeichnung)
- 21. Rang Turnwettkampf 35+: Renato Spahni
- 15. Rang Turnwettkampf 45+: Marcel Wägli

Am 2. Wuchenändi hei de d Vereinswettkämpf statt gfunde u o hie hei mir nid optimali Wättervorussetzige gha, vor allem d Liechtathlete hei chli ds kämpfe gha.

Use cho isch dr 11. Rang ir 2. Stärkeklass mit 26.62 Pünkt und folgende Disziplinenote:

SSB/BAS: 9.23 (10), BA/BP: 8.58 (11), KUG/LP: 9.04 (5)
TAe/TAé: 8.27 (8), PS80/EN80: 8.93 (12), SB/BL: 9.22 (8)
STH/LP: 9.12 (10), WE/SL: 8.57 (6), FTA/FTA: 8.84 (15)

Im 1-teilige Vereinswettkampf hei mir zum Abschluss vo däm Gymnastikprogramm no mal dr 1.Rang usegholt u das mitere Note vo 8.97.

Hie no äs Merci a aui Leiterinne u Kampfrichter für öiie Isatz ir Wettkampfsaison 2016, ohni öich chönnte mir nid starte u scho gar nid so gueti Resultat schaffe.

Fürnä schönä Abschluss nach derä Turnfeschtsaison het d'Barbara Schmid gsorgt. Am 30. Juni hei mir zu ihrä dörfä gah Brätlä und dert d'Summerferie la ilütä.

Während dä Summerferie si aber nid aui untätig gsi. Wiu mir bir Bundesfiir jewils zwöi Häuferinnä müessä steuä, si d'Jasmin Rentsch und d'Marianne Matti dert fürä DTV aktiv gsi.

Afangs Septämber si de ä Gruppe Leichtathlete no am Westamtturntag gstartet u hei wi geng gueti Resultat erzielt:

4. Rang LA w: Steffi Bütler

1. Rang LA m: Ändu Schläppi

2. Rang LA m: Alex Bütler

2. Rang LA Senioren: Fritz Pulfer

Das di beste Resultat, äs si no viel meh gstartet, aber äs gäng ds lang die aui abädsläse.

Und de isch o scho d'Toffener Summerolympiadä und Sportnacht vor dr Tür gstangä. Ar Olympiadä hei 130 Ching und 27 Erwachsäni teilgno. A derä Steu äs grossäs Merci ad Frouäriegä und Männerriegä für ds Kampfrichtärä. Am Abä ischs de diräkt mit dr Sportnacht wyter gangä, dert si rekordverdächtägi 23 Teams am Start gsi. Im OK hei vo üsarä Sitä d'Anina Stucki für d'TSO und d'Stefanie Bütler für d'Sportnacht mitgwürkt. Blanca Hodel und ds Conny Gasparini hei Tombola organisiert und d'Karin Hänni het säch um ds Salatbuffet kümmerät.

Am Volleyballdorfturnier isch dr DTV mit eim Team gstartet und het scho fasch traditionell dr 3. Platz erreicht.

Am 17. Dezämber het ds Thun no „Rock the party“ stattfungä. Das Fescht wird nid vo üs organisiert aber mir dörfä üs dert um d'Garderobä kümmerä und d'Inahmä i üsi Vereinskassä la fliessä. Aus Garderobierä si d'Sarah Bütler, ds Conny Gasparini, d'Jasmin Anderegg und d'Flavia Ryf vor Ort gsi.

Traditionsgemäss hei mir üsäs Vereinsjahr mitäm Wiehnachtshöck beändät. Dä het am 22. Dezämber im Bärä sattfungä und isch vor Chantal Tanner und mir organisiert wordä.

Im 2016 hei mir betreffend Wätter nid so viel Glück gha a dä Wettkämpf, trotzdem hei mir ds beste drus gmacht u zeigt, das mir o unger schwirige Bedinigige gueti Resultat

chöi erturne. Genau das wünschi üs für ds nöie Turnerjahr, also di guete Resultat, ds Wätter chönnt de scho besser si a dä nächste Turnfest.

Öii Houptleiterin
Fabienne Bugnon

Merci a aui, wo 2016 ä Alass organisiert oder äs Ämtli überno hei. Wenn mir das nid uf üs aui chöntä verteilä, würd dä Verein nid funktionierä. Drum a derä Steu mi Dank für öiä Isatz zu Gunschtä vom DTV Toffä. Ig wünschä üs äs erfolgrichs und zfriednigs Turnerjahr 2017!

Öii Presidäntin
Anita Bigler